

A D E S U L O
 =====

Torreat a tie che a bidda mia
 su pessamentu, Desulo istimada
 Sucoro est a toccheddu donzi via
 chi inteno sa tua lumenada
 Sos ocros si coloran de allegria
 de s'immagine tua a sa mirada:
 est affettu disizu e angustia,
 s'istrascicu de sa vida colada.

Cantas iscenas mi torran in mente
 pianas de dolcura e delicadas
 sutta su chelu tuo risplendente
 i' sas carreras cannidas nivadas,
 sa notte de isteddos sorridente
 chene umbras malintenzionadas
 E po cornice a tottu s'ambiente
 sos rivos chi 'achian serenadas.

Ite bellu m'amento in cussu locu
 in iberru comente in beranu
 Tottu paris cuntentos i' su ocu
 o in strada a su primu manzanu
 In istiu e atonzu, cantu jocu
 ozas e fruttos i' su solianu
 e varios colores a su toccu
 de sa natura sa potente manu.

Ma a custu quadru su valore
 li da' sa zente tua e s'alientu
 sas anticas virtudes chi onore
 ti rennen e su menzus ornamentu
 attividada pache e bonumore
 su coro apertu a bonu trattamentu.
 Sicchi, Desulo, lotta chin amore
 E de sa vida lompas a s'intentu!